



Kenyataan Media

CYBERJAYA

12 Mei 2023

MCMC AKAN AMBIL TINDAKAN TEGAS DAN MENGAWAL SELIA KANDUNGAN DIGITAL UNTUK TANGANI MASALAH KEMUDARATAN DALAM TALIAN

Suruhanjaya Komunikasi dan Multimedia Malaysia (MCMC) akan mengkaji semula kerangka kawal selia sedia ada ekoran berlakunya peningkatan tahap kandungan yang dieksploitasi oleh penjenayah dan mereka yang cuba mengganggu-gugat keselamatan awam dan keharmonian negara. Terdapat beberapa aplikasi *Over-The-Top* (OTT) dan platform media sosial yang dilihat gagal mengawal selia penggunaan platform mereka sejajar dengan kepentingan nasional dan perundangan negara. Justeru, tindakan kawal selia yang lebih ketat dan campur tangan oleh pihak pengawal selia adalah diperlukan bagi melindungi kepentingan pengguna dan orang awam.

“MCMC tidak akan berkompromi dengan perbuatan menyalahgunakan platform dalam talian dan telekomunikasi, rangkaian ataupun kemudahan dalam talian untuk tujuan *scam*, aktiviti siber yang berniat jahat, penipuan, *phishing*, kandungan yang menggugat kestabilan dan keharmonian kaum, serta penghinaan terhadap institusi Diraja. Kami akan bertindak terhadap mereka yang melanggar undang-undang. MCMC, selaku ahli dalam Pusat Respons Scam Kebangsaan (NSRC), bersama-sama dengan Polis Diraja Malaysia (PDRM), Bank Negara Malaysia (BNM) dan Pusat Pencegahan Jenayah Kewangan Nasional (NFCC), tekad untuk meneruskan usaha bersama kami dalam memerangi aktiviti penipuan menerusi tindakan-tindakan tegas terhadap mereka yang terlibat,” kata Pengerusi MCMC Tan Sri Mohamad Salim Fateh Din.



Pengerusi MCMC, Tan Sri Mohamad Salim Fateh Din

Kebimbangan tersebut berbangkit selepas hasil pemerhatian yang dijalankan mendapati, jumlah kes penipuan menunjukkan peningkatan. Sejak penubuhan NSRC pada Oktober 2022, sejumlah 11,858 aduan yang berkaitan dengan penipuan telah diterima setakat April 2023. Sementara itu, perangkaan yang diperolehi daripada Jabatan Siasatan Jenayah Komersil (JSJK) PDRM bagi tempoh antara 2021 sehingga April 2023 mendedahkan, jumlah kerugian akibat *scam* mencecah sehingga RM1.2 bilion. Bagi tempoh yang sama juga, jumlah berita palsu yang dilaporkan kepada MCMC adalah sebanyak 2,125. Selepas meneliti bilangan kes penyalahgunaan dan ancaman yang ditimbulkan akibat sikap lepas tangan oleh penyedia platform, pihak MCMC berpendapat, wujud keperluan untuk mengenakan serta menguatkuasakan kewajipan terhadap mereka yang mengendalikan platform sedemikian dan pihak yang mendapat manfaat daripada digitalisasi untuk mengambil langkah-langkah tegas bagi memastikan platform atau rangkaian kendalian mereka tidak digunakan sebagai forum untuk melanggar undang-undang negara ataupun mengancam kepentingan awam.

Pihak pengawal selia dan rakan industri di Singapura, Vietnam dan Indonesia baru-baru ini telah atau dalam proses untuk menggubal undang-undang bagi tujuan mengawal selia serta menjenayahkan aktiviti penipuan dalam sesetengah platform yang dimaksudkan selain mempertanggungjawabkan platform yang gagal mematuhi arahan yang dikeluarkan oleh Kerajaan dengan membenarkan aktiviti-aktiviti berniat jahat seperti penipuan pengiklanan dalam platform mereka atau tidak mengambil langkah yang secukupnya dalam mengekang aktiviti sedemikian. MCMC sebagai badan kawal selia industri tertumpu di Malaysia, akan turut mengkaji semula pendekatan kawal selia untuk

melaksanakan tahap pengawasan yang lebih tinggi menerusi instrumen perundangan sedia ada. Ini termasuklah kajian semula ke atas pengecualian terhadap sesetengah aktiviti selain mengenakan sekatan jenayah dan arahan punitif terhadap entiti yang enggan mengambil langkah-langkah segera bagi memastikan aktiviti-aktiviti jenayah yang berlaku dalam rangkaian atau platform mereka dihentikan.

Tindakan bersama dan usaha yang diambil oleh MCMC adalah penting dalam memastikan masyarakat adalah dilindungi dan mempunyai satu persekitaran yang selamat dalam alam digital. Langkah berkenaan juga akan dapat memastikan rasa kebertanggungjawapan yang lebih tinggi dan hormat kepada kedaulatan nasional dan pada masa yang sama, memperkasakan perlindungan kepada pengguna terhadap kemudaratan dalam talian, termasuk *scam* dan aktiviti penipuan.

JABATAN KOMUNIKASI KORPORAT MCMC

Suruhanjaya Komunikasi dan Multimedia Malaysia | Malaysian Communications and Multimedia Commission
MCMC Tower 1, Jalan Impact, Cyber 6, 63000 Cyberjaya, Selangor MALAYSIA
T: + 60 3 86 88 80 00 | F: + 60 3 86 88 10 00 | E: scd@mcmc.gov.my | W: www.mcmc.gov.my



Suruhanjaya Komunikasi
Dan Multimedia Malaysia



MCMC_RASMI



SKMM_MCMC



MCMCTV